

Viahe hopi fructifero di Cuerpo Policial pa Philadelphia

Miembronan di KPA a sigui diferente curso



Segun miembronan di e delegacion, nan a wak aparatonan y tecnicanan hopi sofisticada pa resolve crimen, cu nan no tabata sa cu ta existi.

Nan a conoce tambe e "Centrale Post" di Philadelphia, cu ta consisti di 47 telefonista di 911, kendenan tin tambe computernan ultra



ORANJESTAD(AAN):
Diamars atardi a yega for di Philadelphia un delegacion di Cuerpo Policial cu a consisti di Halto Comisario Ronny Bernadina, Comisario Coizy Krozendijk, Rudy Soemers, Johny Henriquez, Elvis Luidens, Alexander Henriquez y Erwin Lampe.

E delegacion aki a bay Philadelphia ariba invitacion di Frank Rizzo di Cuerpo Policial di Philadelphia, pa atende diferente curso y demostracion.

E polisnan di Aruba a haya cursonan den tiramento, cursonan riba explosivonan, riba coremento di auto ora cu nan ta den un persecucion y tambe instrucionnan hopi interesante riba coremento di brommer.

Segun miembronan di cuerpo policial cu a bay riba e viahe aki, nan a aprecia hopi e oportunidad aki, cu a worde brinda na nan pa cuerpo Policial di Philadelphia, cu a cubri tur e gastonan.

Tur e polisnan di Aruba a keda totalmente impresiona tambe cu e "Forensic Lab" di Philadelphia, cu ta un di esnan mas sofisticada na mundo.

moderno pa yuda nan cu nan trabao.

Ora cu e grupo di Aruba a bay cera conoci cu Comisario di Philadelphia, prensa Mericano a baha riba nan manera un beer riba honing, pa haci pregunta relaciona cu e caso di Natalee Holloway.

Halto Comisario Ronny Bernadina a splica prensa un biaha mas cu Aruba ta un lugar hopi sigur y cu e caso di Natalee ta algo cu no sa pasa na Aruba.

E miembronan di Cuerpo Policial di Aruba a keda hopi impresiona y a siña hopi di e viahe aki y e polisnan di Philadelphia tambe tabata contento di a pasa e dianan cu nos polisnan, unda cu nan a expresa cu nan ta encanta cu Aruba y cu nan ta dispuesto pa mantene lasonan estrecho cu nos Cuerpo Policial.

